

---

# Die leksikografiese bewerking van verwantskapsterme in Sepedi

D.J. Prinsloo, Departement Afrikatale, Universiteit van Pretoria,  
Pretoria, Suid-Afrika ([danie.prinsloo@up.ac.za](mailto:danie.prinsloo@up.ac.za))

---

**Opsomming:** Die verwantskapsterminologie van Sepedi is omvangryk en vorm 'n komplekse sisteem. In teenstelling met tale soos Afrikaans, Engels en Duits word groter uitdagings aan die Sepedileksikograaf gestel ten opsigte van die identifisering van verwantskapsterme en die lemmatisering en bewerking daarvan. Voorafstudie van die verwantskapsterminologiestelsel is 'n voorvereiste vir suksesvolle gebruikersleiding. Die Sepedi leksikograaf is die tussenganger tussen veral die onervare woordeboekgebruiker en hierdie ingewikkelde verwantskapsterminologiesisteem, en moet derhalwe sorg vir effektiewe lemmatisering en voldoende bewerking van verwantskapsterme. Die aard en omvang van verwantskapsterminologie in Sepedi word ontleed en daar word aangetoon dat verwantskapsterminologie in Sepedi problematies is, veral ten opsigte van die lemmatisering van samestellings, en in besonder, afgeleide enkelwoordvorme en frase, soos byvoorbeeld veelvuldige besitskonstruksies. Ten einde toegang tot verwantskapsterme in die woordeboek te vergemaklik word 'n leksikografiese konvensie vir die lemmatisering van verwantskapsterme voorgehou. Korpusvoorkomste van verwantskapsterme word aangegee en ruimte word afgestaan vir 'n kritiese evaluering van die lemmatisering en bewerking van verwantskapsterme in Sepediwoordeboeke.

**Sleutelwoorde:** VERWANTSKAPSTERME, SEPEDI, STAMBOOM, PATERNE, LEMMATISERING, WOORDEBOEKKONVENTSIE, LEKSIKOGRAFIESE BEWERKING, RESEPTIEWE WOORDEBOEKGEBRUIK, PRODUKTIEWE WOORDEBOEKGEBRUIK, GEBRUIKSFREKWENSIE

**Abstract:** **The lexicographical treatment of kinship terminology in Sepedi.** Kinship terminology in Sepedi is extensive and forms a complex system. In contrast to languages such as Afrikaans, English and German the lexicographer faces greater challenges in respect of the identification of kinship terms and the lemmatisation and treatment thereof in Sepedi dictionaries. Preparational studies of the kinship terminology system are a prerequisite for successful user guidance. The Sepedi lexicographer is the mediator, especially between the inexperienced dictionary user and this complicated kinship terminology system, and therefore has to provide for effective lemmatisation and sufficient treatment of kinship terms. The nature and extent of kinship terminology in Sepedi are analysed and it is indicated that kinship terminology in Sepedi is problematic, especially in respect of the lemmatisation of compounds, and in particular, derived single-word forms and phrases, such as for example multiple possessive constructions. In order to ease access to kinship terms in dictionaries, a lexicographic convention for the lemmatisation of kinship terms is suggested. Corpus occurrences of kinship terms are indicated and space is allocated for a critical evaluation of the lemmatisation and treatment of kinship terms in Sepedi dictionaries.

**Keywords:** KINSHIP TERMS, SEPEDI, FAMILY TREE, PATERNAL, LEMMatisATION, DICTIONARY CONVENTION, LEXICOGRAPHIC TREATMENT, RECEPITIVE DICTIONARY USE, PRODUCTIVE DICTIONARY USE, FREQUENCY OF USE

## 1. Inleiding


Die verwantskapsterminologie van Sepedi is omvangryk en vorm 'n komplekse sisteem. Prinsloo en Van Wyk (1992) poog om 'n paterne boomstruktur te beskryf in terme van verskillende generasies, manlike en vroulike verwante, in terme van hoe 'n man (Ego) en sy vrou alle familielede van die man sal aanspreek of na hulle verwys.

Verwantskapsterme kom as enkelwoorde, samestellings en in konstrukties (hoofsaaklik besitskonstruksies) voor en die leksikograaf se dilemma is om lemmatiseringstrategieë te identifiseer wat alle verwantskapsterme in Sepedi in 'n omvattende woordeboek sal ondervang. Bestaande woerdeboeke bied bloot selektief lemmas aan wat op grond van gebruiksfrekvensie in 'n korpus, of intuïtief geselekteer is. In hierdie artikel word 'n meer uitgebreide sisteem soos deur Prinsloo en Van Wyk (1992) voorgehou word as vertrekpunt geneem vir die voorgestelde lemmatiseringsproses. Hierdie sisteem, hoewel omvattend, bied ten beste net die terme vir familielede van die man. Die spieëlbeeld, naamlik hoe 'n vrou en haar man die *vrou* se verwante aanspreek of na verwys, kom nie eers hier ter sprake nie.

Die leksikograaf se rol is dié van 'n tussenganger tussen 'n komplekse struktuur aan die een kant en die woerdeboekgebruiker aan die ander kant. Vir die doel van hierdie artikel word aanleerders van Sepedi as teikengebruikers geïdentifiseer.

Daar sal eerstens gepoog word om 'n lemmatiseringstrategie vir verwantskapsterme in Sepedi te formuleer uit die aanbod van enkelwoorde, samestellings en konstruksies in Prinsloo en Van Wyk (1992). Tweedens word verwantskapsterme in Prinsloo en Van Wyk (1992) se voorkoms in die *Pretoria Sepedi Corpus* (PSC) bestudeer en die lemmatisering en bewerking van verwantskapsterme in bestaande woerdeboeke vir Sepedi onder die loep geneem. Evaluering van Sepediwoerdeboeke word in terme van die lemmaaanbod en die kwaliteit van die bewerking gedoen. Derdens word 'n nuwe leksikografiese konvensie voorgestel vir die lemmatisering van verwantskapsterme in omvattende aanleerderswoerdeboeke vir Sepedi.

Die lemmatisering van verwantskapsterme in 'n algemene woerdeboek is 'n gegewe en geen woerdeboek kan bekostig om nie terme soos *oom*, *broer*, *suster*, *oupa* of *ouma* te lemmatiseer en te bewerk nie. Die omvang en kompleksiteit van verwantskapsterminologiestelsels verskil egter van mekaar. So, byvoorbeeld, gee *Macmillan English Dictionary* (MED) die volgende diagram in figuur 1.




**Figuur 1:** Familiestamboom in MED

Prinsloo en Bosch (2012) verwys na figuur 1 as 'n struktuur van *interpreteerbare kompleksiteit* (comprehensible complexity) waarvan die terme met behulp van standaard leksikografiemetodes bewerk kan word terwyl hulle meen dat verdere gebruikersleiding nodig is in die geval van verwantskapsterminologiestelsels vir isiZulu en Sepedi.

## 2. Sepedi verwantskapterminologie as 'n komplekse sisteem

Teenoor figuur 1 staan die verwantskapstelsel van Sepedi in figuur 2 in skrille kontras en kan laasgenoemde nie bloot leksikografies hanteer word deur met die blote bewerking van verwantskapsterminologie lemmas in die sentrale teks van die woordeboek te volstaan nie.




Figuur 2: Paterne diagram vir Sepedi (Prinsloo en van Wyk 1992: 45)

Hierdie figuur is selfs te kompleks vir aanbieding in die agtertekste-afdeling van die woordeboek en ten beste gesik as die verwysingsadres in 'n buiteteks,

soos byvoorbeeld Prinsloo en Van Wyk (1992). Figuur 2 reflekteer verder slegs die paterne relasies (hoe 'n man A2.2 en sy vrou r2.2 die *man* se verwante sal aanspreek of na hulle sal verwys).

Figuur 2 bied nietemin die ideale vertrekpunt vir die leksikograaf in die lemmatiseringsproses van verwantskapsterme. In die eerste plek moet hy/sy die komplekse struktuur kan afbreek in terme van die "boustene", byvoorbeeld die verskillende generasies soos 'n man se vader se broers en susters in figuur 3. So, byvoorbeeld, kan die Sepedi leksikograaf die stelsel in figuur 2 afbreek tot 19 boustene soos deur Prinsloo en Van Wyk (1992) gedoen is. Sekere gedeeltes of die samevoeging van gedeeltes kan dan as verteerbare vereenvoudigde skematische voorstellings met voorbeeld in die agtertekste-afdeling aangebied word.



**Figuur 3:** Verwantskapsterme vir 'n man se vader se broers en susters

Aanspreekvorme/variante (Verwysingsterme tussen hakies)		
F2-Generasie	Ego A2.2 (manlik)	Ego r2.2 (vroulik)
Oom	A1.1 Ramogolo (Ramogolo)	
Tante	A1.1W Mmamogolo (Mmamogolo/ Mogatša ramogolo)	Soos vir ego A2.2 met opsionele byvoeging van 'wa mogatšaka' 'van my eggenoot'
Tante	a1.1 Rakgadi (Rakgadi/Rakgadi yo mogolo)	
Oom	a1.1H Mogatša' rakgadi/Rakgadi (Mogatša' rakgadi yo mogolo)	
Vader	A1.2 Tate (Tate)	Tate/Ratswale (Ratswale)
Moeder	k1.2 Mme/Mma (Mme/Mma)	Mme/Mma/Matswale (Mme/ Mma/Matswale)
Vader se vrou	A1.2W2 Mmane/Mmangwane (Mmane/Mmangwane Mogatša' tate wa bobedi)	Mmane/Mmangwane (Mmane/ Mmangwane Mogatša wa ratswale wa bobedi)
Oom	A1.3 Rangwane (Rangwane)	
Tante	A1.3W Mmane/Mmangwane (Mmane/Mmangwane Mogatša' rangwane)	Soos vir ego A2.2 met opsionele byvoeging van 'wa mogatšaka' 'van my eggenoot'
Tante	a1.2 Rakgadi (Rakgadi (yo monyane))	

Oom	a1.2H Mogatša' rākgadi/Rākgadi (Mogatša' rākgadi (yo monyane))	
Tante	a1.3 Rakgadi (Rakgadi (yo a latelago rakgadi yo monyane)) (yo monyane)	Soos vir ego A2.2 met opsionele byvoeging van 'wa mogatšaka' 'van my eggenoot'
Oom	a1.3H Mogatša' rākgadi/Rākgadi (Mogatša' rākgadi (yo a latelago rakgadi yo monyane))	

**Tabel 1:** Verwantskapsterme vir 'n man se vader se broers en susters  
(Prinsloo en Van Wyk 1992: 47-48)

In hierdie voorbeeld word die verwantskapstruktuur en verwantskapsterme van 'n man se vader se broers en susters meer gebruikersvriendelik as in figuur 2 aangebied bloot omrede kleiner gedeeltes een vir een aan die orde gestel word. Dit doen nie afbreuk aan die geheelbeeld nie maar bied die ooreenkomste en verskille, veral ten opsigte van hoe die persoon aangespreek word teenoor hoe daar na die persoon verwys moet word in verteerbare eenhede. Die boomdiagram vorm steeds 'n kernelement van die inligtingaanbod. Die eerste taak in terme van die afbreek van komplekse verwantskapterminologiestelsels behels dus bestudering van die struktuursamestelling en die identifisering en analise van die boustene, bv. figure 2 en 3.

### 3. Lemmatisering

Die tweede hoofaktiwiteit lê op grammatikale vlak in terme van die analise, groepering en redusering van sintaktiese strukture en is sonder meer afgestem op lemmatisering. Die benadering hier is gerig op die onervare teikengebruiker wat Sepedi wil leer en 'n omvattende woerdeboek vir reseptiewe (dekoderende) sowel as produktiewe (enkoderende) doeleinades wil gebruik. Geen grondige kennis van die grammatika van Sepedi word dus voorveronderstel nie. In terme van die Funksieteorie (Tarp 2008), lê die behoefte hier veral op die vlak van die kognitiewe en kommunikatiewe vaardighede.

#### 3.1 Lemmatisering van enkelwoorde

Die maklikste gevalle is waar die verwantskapsterm deur 'n onafgeleide enkelwoord in die enkelvoud soos *malome* 'oom' en *mokgotse* 'swaer' benoem word. Hierdie verwantskapsterme kan sonder meer gelemmatiseer en leksikografies bewerk word.

Die tweede oorweging raak die lemmatisering van enkelvouds- versus meervoudsvorme van verwantskapsterme. Enkelvouds- en meervoudsvorming word in Sepedi deur prefiksé gedoen. Van Wyk (1987) wys daarop dat die

meervoudsprefiks *bo-* van klas 2a, byvoorbeeld *botate* nie sonder meer meervoudigheid aandui nie maar 'n respeksvorm kan wees, of meervoudigheid in die vorm van *vader-hulle* aandui. Tabel 2 illustreer die sisteem vir die eerste agt naamwoordklasse uit die naamwoordklassesisteem van Sepedi.

<i>Klas</i>	<i>Prefiks</i>	<i>Voorbeeld</i>	<i>Besitskakel</i>	<i>Besitlike voornaamwoord</i>
1	mo-	monna 'man'	wa	gagwe
2	ba-	banna 'mans'	ba	bona
<b>1a</b>	<b>ø/N-</b>	<b>tate 'vader'</b>	<b>wa</b>	<b>gagwe</b>
<b>2b</b>	<b>bo-</b>	<b>botate 'vaders'</b>	<b>ba</b>	<b>bona</b>
3	mo-	motse 'stat'	wa	wona
4	me-	metse 'statte'	ya	yona
5	le-	lesogana 'jongman'	la	lona
6	ma-	masogana 'jongmans'	a	ona
7	se-	selepe 'byl'	sa	sona
8	di-	dilepe 'byle'	tša	tšona

**Tabel 2:** Die eerste agt naamwoordklasse van Sepedi

Enkelvouds- en meervoudsaanduiding deur middel van prefikse is uiteraard problematies deurdat die leksikograaf moet besluit of hy/sy slegs enkelvoude of enkelvoudsvorme sowel as meervoudsvorme wil lemmatiseer. So, byvoorbeeld, moet die leksikograaf besluit of slegs *monna* en *tate*, of beide *monna* en *banna*, en *tate* en *botate* in tabel 2 gelemmatiseer moet word. Laasgenoemde neem uiteraard meer ruimte in die woordeboek in beslag en die lemmas kom in verskillende artikeltrajekte teregt, wat op sy beurt weer kruisverwysings impliseer indien die leksikograaf nie beide die enkelvouds- en meervoudsvorme volledig wil bewerk nie.

*Pukuntšu Dictionary* (PUKU 1) lemmatiseer beide enkelvouds- en meer- voudsvorme. Die gebruiker kan dus *monna* onder *mo-* en *banna* onder *ba-* respektiewelik in die alfabetiese gedeeltes M en B in die woerdeboek opsoek. Dieselfde geld vir *mokgotse* 'swaer, skoonsuster' waar ook die meervoudsvorm *bakgotse* 'swaers', en beide *malome* 'oom, ma se broer' en die meervoudsvorm *bomalome* 'ooms, ma se broers' as afsonderlike artikels aangebied word. Hier teenoor word slegs enkelvoudsvorme in *Pukuntšu woerdeboek, Noord-Sotho-Afrikaans, Afrikaans-Noord-Sotho* (PUKU 2) gelemmatiseer en word daar van die gebruiker verwag om *banna* onder *monna* op te soek en *botate* onder *tate*. In laasgenoemde geval voorveronderstel die leksikograaf kennis van die naamwoord-

struktuur van die gebruiker maar bied ook sekere hulpmiddels in die voorwerk aan wat die gebruiker kan help om die enkelvoudsvorme te bepaal.

Die derde aspek vir besinning ten opsigte van die lemmatisering van enkelwoorde behels afgeleide of saamgestelde vorme, veral die hoëfrekwensieafleidings *-ago* 'van jou', *-agwe* 'van hom of haar', *mma-* 'moeder' en *mogatša-*'eggenoot'. Tabel 3 lys byvoorbeeld die 20 vorme waarin *malome* in die PSC voorkom.

Verwantskapsterm	Voorkomste in die PSC	Vertaling
<b>bomalome</b>	<b>20</b>	ooms
bomalomeabo	1	hulle ooms
bomalomeabona	1	hulle ooms
<b>bomalomeago</b>	<b>5</b>	jou ooms
<b>bomalomeagwe</b>	<b>9</b>	sy/haar ooms
bomalomeatšona	1	hulle ooms
<b>bommamalome</b>	<b>1</b>	die moeders van oom/oom se moeder-hulle
bomogatšamalomeabona	1	eggenotes van hulle oom
<b>gamalome</b>	<b>5</b>	by oom se plek
<b>gamalomeagwe</b>	<b>1</b>	by sy oom se plek
<b>malomeago</b>	<b>83</b>	jou oom
<b>malomeagwe</b>	<b>201</b>	sy/haar oom
malomeake	3	my oom
malomealena	1	julle oom
malomeatšona	2	hulle oom
<b>mmamalome</b>	<b>10</b>	oom se moeder
<b>mmamatšamalomeagwe</b>	<b>3</b>	sy/haar oom se moeder
<b>mogatšamalome</b>	<b>9</b>	oom se eggenoot
<b>mogatšamalomeagwe</b>	<b>9</b>	sy/haar oom se eggenoot
ngwanamalome	2	oom se kind

**Tabel 3:** Afleidings van *malome* in die PSC

Die vraag is of hierdie afleidings, byvoorbeeld die paradigma *malomeago* 'jou oom', *malomeagwe* 'sy/haar oom', *mmamatšamalome* 'oom se moeder' en *mogatšamalome* 'oom se vrou' afsonderlik gelemmatiseer moet word. Vergelyk byvoorbeeld *Oxford Bilingual School Dictionary: Northern Sotho and English* (ONSD) ten opsigte van *malomeago* en *malomeagwe* in figuur 4.

---

<b>malome</b> ** noun 1a/2b (pl. <b>bomalome</b> )
■ maternal uncle • <b>Malome</b> wa ka o nyala mosadi wo mobotse. <i>My maternal uncle is marrying a beautiful woman.</i>
<b>malomeago</b> noun 1a/2b (pl. <b>bomalomeago</b> ) ■ your maternal uncle
• Naa malomeago o tlo go tšea ka nako mang? <i>What time is your maternal uncle coming to fetch you?</i>
<b>malomeagwe</b> /malomeagwē/ noun 1a/2b (pl. <b>bomalomeagwe</b> ) ■ her/his maternal uncle • O tlile le <b>malomeagwe</b> maabane. <i>He came with his maternal uncle yesterday.</i>

**Figuur 4:** *Malome, malomeago en malomeagwe* in ONSD

In wese voeg die laaste twee artikels bloot die betekenis 'van jou' en 'van hom/haar' toe. Vir 'n skoolwoordeboek soos ONSD wat op die basis van gebruiksfrekvensie saamgestel is, is dit aanvaarbaar en gebruikersvriendelik. Die leksikograaf kan egter besluit dat hierdie afleidings nie gelemmatiseer moet word nie omdat hulle genoegsaam deursigtig is en ook nie enige morfologiese veranderinge tot gevolg het nie. Die leksikograaf kan dan die gebruiker tegemoetkom deur die afleidings *-ago* en *-agwe* binne die artikel van die onafgeleide term te bewerk soos wat dit in PUKU 1 gedoen is waar beide die vorme *malomago* en *malomagwe* in die artikel van *malome* bewerk word. Dat die omvang van afleidings van verwantskapsterme met byvoorbeeld *-ago* en *-agwe* baie groot is blyk byvoorbeeld uit die frekwensies van die tien hoogsgebruikte afleidings met *-agwe* in die PSC:

mmagwe (1,483), 'sy/haar moeder'	tatagwe (1,237) 'sy/haar vader'
rragwe (287) 'sy/haar vader'	mogatšagwe (217) 'sy/haar eggenoot'
morwagwe (207) 'sy/haar seun'	malomeagwe (201) 'sy/haar oom'
morwediagwe (163) 'sy/haar dogter'	morwarragwe (146) 'sy/haar broer'
mogolwagwe (109), 'sy/haar neef'	rakgadiagwe (87), 'sy/haar vader se suster'

Die vraag is of daar nie 'n alternatiewe lemmatiseringstrategie vir afgeleide vorme gevind kan word nie en hierdie aspek word in paragraaf 3.3 hieronder verder bespreek.

### 3.2 Lemmatisering van frase, woordgroepes en grammatale konstruksies

Wanneer meer ingewikkelde strukture onder die loep geneem word, is dit wenslik om benewens enkelwoordlemmatisering ook ander opsies te oorweeg. Vergelyk die volgende konstruksies in tabel 5 van Prinsloo en Van Wyk (1992: 50) in tabel 4, as basis vir die eersvolgende analise:

Ego A2.2 (male)
A3.1WF Mokgotse (Mokgotse (wa ka) ka morwa yo mogolo)
A3.1WM Mogatša wa Mokgotse (Mogatša wa mokgotse (wa ka) ka morwa yo mogolo)
a3.1HF Mokgotse (Mokgotse (wa ka) ka morwedi yo mogolo)
a3.1HM Mogatša wa mokgotse (Mogatša wa mokgotse (wa ka) ka morwedi yo mogolo)
A3.2WF Mokgotse (Mokgotse (wa ka) ka morwa wa bobedi)
A3.2WM Mogatša wa mokgotse (Mogatša wa mokgotse (wa ka) ka morwa wa bobedi)
a3.2HF Mokgotse (Mokgotse (wa ka) ka morwedi wa bobedi)
a3.2HM Mogatša wa mokgotse (Mogatša wa mokgotse (wa ka) ka morwedi wa bobedi)
A3.3WF Mokgotse (Mokgotse (wa ka) ka morwa wa phejane)
A3.3WM Mogatša wa mokgotse (Mogatša wa mokgotse (wa ka) ka morwa wa phejane)

**Tabel 4:** Man se eie kinders se skoonouers

In tabel 4 tree *mokgotse* 'swaer' in 'n verskeidenheid konstruksies op waarvan die besitskonstruksie die mees frekwente is byvoorbeeld *mogatša wa mokgotse* (*mogatša* (naamwoord klas 1), *wa* (besitskakel klas 1) en *mokgotse* (naamwoord klas 1)) 'eggenoot van *mokgotse*'. Die leksikograaf het hier te make met die twee sleutelwoorde *eggenoot* en *swaer* en kan wel besluit om *mogatša wa mokgotse* as multiwoord lemma op te neem. Dit sou byvoorbeeld 'n opsie wees in grondslagfase woerdeboeke waar daar nie noodwendig aanvaar kan word dat die gebruiker vertroud is met die besitskonstruksie in Sepedi nie.

'n Tweede opsie is om van die standpunt uit te gaan dat die struktuur *eggenoot van iemand* deursigtig is wat nóg die aanbod as multiwoord lemma nóg enige verdere gebruikersleiding vereis. Dit sou byvoorbeeld gepas wees vir meer gevorderde aanleerders van die taal vir wie beide die besitskonstruksie en waarskynlik ook die betekenis van die hoëfrekwensiewoord *mogatša* (228 voorkomste in die PSC) bekend is.

Die leksikograaf word egter gekonfronteer met 'n verskeidenheid van nog meer komplekse strukture, byvoorbeeld a.3.2HM waar verwysing deur 'n manlike persoon na sy tweede dogter se man se moeder ter sprake is:


*Mogatša wa mokgotse (wa ka) ka morwedi wa bobedi*  
(eggenoot van swaer (van my) met dogter van tweede)  
'my tweede dogter se eggenoot se moeder'

Hier het die leksikograaf met drie besitskonstruksies (die eerste twee in tandem) asook met die gebruik van die instrumentalis (*ka* 'met') en 'n rangtelwoord (*bobedi* 'tweede') te make. Die vraag is hoe so 'n komplekse struktuur gelemmatiseer moet word. Die leksikograaf sal met reg huiwer om hierdie voorbeeld as 'n nege-woord lemma op te neem maar besef wel die behoefté aan sterker gebruikersleiding as die blote lemmatisering van enkelwoorde uit die frase. Dit kan ook geargumenteer word dat die struktuur, hoewel baie kompleks, steeds volkome deursigtig is en dat daar gevvolglik op enkelwoordlemmas besluit kan word. Dit sou egter beteken dat die onervare gebruiker tot soveel as nege lemmas sou moes opsoek ten einde die betekenis van *mogatša wa mokgotse (wa ka) ka morwedi wa bobedi* te konstrueer.

Indien al die terme in tabel 4 in die artikel van *mokgotse* bewerk sou word, sal dit tot 'n baie lywige artikel vir *mokgotse* lei. Soortgelyke lemmatisering van die ander komplekse konstruksies in die verwantskapsterminologiesisteem sal nie haalbaar wees in terme van beskikbare spasie in 'n papierwoordeboek nie. Net soos in die geval van afgeleide enkelwoordvorme in 3.1 hierbo is die vraag of daar nie 'n alternatiewe oplossing vir die lemmatisering van frases, woordgroepe en grammaticale konstruksies gevind kan word nie.

### 3.3 'n Leksikografiese konvensie vir die lemmatisering van verwantskapsterme

'n Oplossing vir die herhalende patronne in 3.2 asook vir die talle enkelwoordafleidings wat in 3.1 en in tabel 3 ten opsigte van *malome* bespreek is, kan gevind word in die samestelling van 'n leksikografiese konvensie vir verwantskapsterminologie. Só 'n konvensie is 'n kompakte substitusiestruktuur vir die reduseering van strukture soortgelyk aan die sogenaamde *ga/sa/se* konvensie van Prinsloo en Gouws (1996) wat sedertdien in ONSD, *Popular Northern Sotho Dictionary* (POP) en *New Sepedi Dictionary, English–Sepedi* (NSD) gebruik word vir werkwoordstamme wat op 'n -e eindig. Die doel is om 'n kragtige konvensie te ontwerp wat vir 'n aantal herhalende partone voorsiening maak. Só 'n konstruksie moet verstaanbaar vir die teikengebruiker wees en in die gebruikersgids van die woordeboek verduidelik word. Vergelyk, byvoorbeeld, die bekendstelling en uitvoerige verduideliking van hierdie konvensie in die voorwerk van NSD, en ook die groot aantal strukture wat deur dié konvensie ondervang word, in figuur 5.



**Figuur 5:** Gebruikersleiding en aanduiding van die reikwydte van die *ga/sa/se* konvensie in NSD

Vir die lemmatisering van verwantskapsterme word gepoog om 'n enkele konvensie te ontwerp ten einde 'n komplekse stel enkelwoordafleidings, asook 'n komplekse stel frases sinvol te lemmatiseer. Net soos in die geval van die ontwerp van die *ga/sa/se* konvensie is dit moontlik om 'n konvensie te ontwerp wat voorsiening maak vir alle elemente van deursigtige herhalingspatrone soos *mmago-*, *mmelega-*, *-ake*, *-ago*, *-agwe* en besitskonstruksies soos *mogatša (wa) ~.* Die eerste stap is om die elemente te lys wat kandidate is vir opname in die konvensie.

ga/bo/mma/mogatša (wa)/ngwana (wa)/	Elemente wat voor die lemma optree
~	Die lemma bv. <i>malome</i>
/ago/agwe/abo(na)/ake/atšo(na)/alena/ayo(na)/ aona/asona/yo mogolo/wa bobedi/phejane/ mafelelo	Elemente wat na die lemma optree

**Tabel 5:** Kandidaatelemente vir opname in 'n leksikografiese konvensie vir verwantskapsterme

Die struktuur in tabel 5 maak voorsiening vir 'n wye verskeidenheid enkelwoordafleidings en frases. So, byvoorbeeld, ondervang tabel 5 alle afleidings van *malome* in tabel 3 hierbo asook die grootste gedeelte van strukture in tabel 4 en die volledige paradigma van besitlike voornaamwoorde. Hierdie struktuur is egter te lywig, onprakties en gebruikersonvriendelik vir 'n leksikografiese konvensie. Net soos in die geval van die ontwerp van die *ga/sa/se* konvensie (Prinsloo en Gouws: 1996) is dit nodig om die reeks elemente in tabel 5 te verminder op grond van frekwensie tot 'n voorgestelde:

**ga/bo/mma/mogatša /~/ake/ago/agwe/abo(na)/ake/atšo(na)/alena**

of 'n verder gereduseerde:

**bo/mma/mogatša /~/ago/agwe**

Die leksikograaf kan besluit watter konvensie die mees doeltreffendste vir die tipe gebruiker en die spesifieke woordeboek sal wees.

#### 4. Die leksikografiese bewerking van verwantskapsterme in bestaande Sepedi woordeboeke

Uitvoerige besinning ten opsigte van leemtes in die lemmatisering en bewerking van verwantskapterminologie is nie moontlik binne die bestek van 'n artikel nie en slegs die mees problematiese aspekte word hier onder die loep geneem. Die eerste leemte raak die lemma-aanbod deurdat daar in die meeste woordeboeke oënskynlik geen seleksiestrategie vir die opname van verwant-

skapsterme is nie en terme gevolglik maar op sterkte van die intuisie van die leksikograaf opgeneem is. In tabel 6 word enkelwoord verwantskapsterme uit Prinsloo en Van Wyk (1992) gelys wat in die PSC voorkom, en hulle opname ( $\checkmark$ ), of weglatting (x), uit *Groot Noord-Sotho-woordeboek, Noord-Sotho-Afrikaans/Engels (GNSW)*, *Sesotho sa Leboa/English Pukuntšu Dictionary (SLEPD)*, ONSD, *Pukuntšuthaloši ya Sesotho sa Leboa* (PTLH), PUKU 1 en POP. Terme wat in hakies gegee word, is alternatiewe spellings.

Term	Vertalekwyalent	PSC	GNSW	SLEPD	ONSID	PTLH	PUKU 1	POP
kgaitšedi/ (kgaešedi)	broer of suster	38	$\checkmark/\checkmark$	x/ $\checkmark$	x/ $\checkmark$	x/ $\checkmark$	$\checkmark/\checkmark$	$\checkmark/\checkmark$
koko	ouma	223	$\checkmark$	$\checkmark$	$\checkmark$	$\checkmark$	$\checkmark$	$\checkmark$
malome	oom	558	$\checkmark$	$\checkmark$	$\checkmark$	$\checkmark$	$\checkmark$	$\checkmark$
matswale	skoonmoeder	14	$\checkmark$	x	x	x	x	$\checkmark$
mma	moeder	1060	$\checkmark$	X	$\checkmark$	$\checkmark$	$\checkmark$	$\checkmark$
mmakgolo	ouma	3	x	x	x	x	$\checkmark$	x
mmamalome	oom se moeder	11	x	x	x	x	x	x
mmamogolo	moeder se ouer suster	57	$\checkmark$	$\checkmark$	x	$\checkmark$	$\checkmark$	$\checkmark$
mmane	moeder se jonger suster	61	$\checkmark$	$\checkmark$	$\checkmark$	$\checkmark$	$\checkmark$	$\checkmark$
mmangwane	moeder	39	$\checkmark$	$\checkmark$	x	$\checkmark$	$\checkmark$	$\checkmark$
mmatswale	skoonmoeder	75	$\checkmark$	$\checkmark$	$\checkmark$	$\checkmark$	x	$\checkmark$
mme	moeder	5524* >100	$\checkmark$	$\checkmark$	$\checkmark$	x	$\checkmark$	$\checkmark$
mogadibo	broer se vrou	82	$\checkmark$	$\checkmark$	$\checkmark$	$\checkmark$	$\checkmark$	$\checkmark$
mogadikana/ (mogadikane)	medevrou	3	x/ $\checkmark$	$\checkmark/\checkmark$	x/x	$\checkmark/\checkmark$	x/ $\checkmark$	x/ $\checkmark$
mogaditsong	medevrou	61	$\checkmark$	$\checkmark$	x	$\checkmark$	$\checkmark$	$\checkmark$
mogatšaka	my eggenoot	188	x	x	$\checkmark$	x	x	$\checkmark$
mogatšake	my eggenoot	22	x	x	x	x	x	x
mogolle	ouer broer/suster	90	$\checkmark$	X	$\checkmark$	X	$\checkmark$	$\checkmark$
mogolwake	my ouer broer/sus- ter	39	x	x	x	x	x	x
mokgonyana	skoonseun	260	$\checkmark$	$\checkmark$	$\checkmark$	$\checkmark$	$\checkmark$	$\checkmark$
mokgotse	swaer/skoonsuster	189	$\checkmark$	$\checkmark$	$\checkmark$	$\checkmark$	$\checkmark$	$\checkmark$
molamo	swaer	315* >100	$\checkmark$	$\checkmark$	$\checkmark$	$\checkmark$	$\checkmark$	$\checkmark$
monyanana	jonger broer of sus- ter	28	$\checkmark$	x	x	$\checkmark$	$\checkmark$	$\checkmark$
moratho	jonger broer of suster	114	$\checkmark$	$\checkmark$	$\checkmark$	$\checkmark$	$\checkmark$	$\checkmark$
morwa	seun	3803	$\checkmark$	$\checkmark$	$\checkmark$	$\checkmark$	$\checkmark$	$\checkmark$
morwaka	my seun	7	x	x	x	x	x	$\checkmark$
morwake	my seun	45	x	$\checkmark$	x	$\checkmark$	x	$\checkmark$
morwarre	broer	127	$\checkmark$	$\checkmark$	$\checkmark$	$\checkmark$	$\checkmark$	$\checkmark$
morwedi	dogter	1000	$\checkmark$	$\checkmark$	$\checkmark$	$\checkmark$	$\checkmark$	$\checkmark$
morwediaka	my dogter	7	x	x	x	x	x	x
morwediake	my dogter	34	x	$\checkmark$	x	$\checkmark$	x	x
motlogolo	kleinkind	177	$\checkmark$	$\checkmark$	$\checkmark$	$\checkmark$	$\checkmark$	$\checkmark$
motswala	neef/niggie	120	$\checkmark$	$\checkmark$	$\checkmark$	$\checkmark$	$\checkmark$	$\checkmark$
motswalake	my neef/niggie	14	x	x	x	x	x	$\checkmark$
ngwanangwanake/ ngwanangwanaka	my kleinkind	5	x/x	x/ $\checkmark$	x/x	x/ $\checkmark$	x/x	x/x
ngwanego	jou familielid	3	x	x	x	x	x	x

ngwetši	skoondogter	637	✓	✓	✓	✓	✓	✓
nnake	my jonger broer / suster	8	✓	✓	x	✓	✓	x
Rakgadi	vader se suster	348	✓	✓	✓	✓	✓	✓
Rakgolo	grootvader	190	✓	✓	✓	✓	✓	✓
rakgolokhukhu	voorvader	8	✓	✓	x	✓	✓	x
ramogolo	vader se ouer broer	114	✓	✓	✓	✓	✓	✓
rangwane	vader se jonger broer	354	✓	✓	✓	✓	✓	✓
ratswale	skoonvader	26	✓	✓	x	✓	✓	✓
rra	vader	55	x	✓	x	x	✓	✓
Samma	jonger broer of suster	40	✓	✓	x	✓	✓	✓
tate/tata	vader	1517	✓/✓	X/✓	✓/x	✓/x	✓/✓	✓/✓
tatemogolo	oupa	9	x	x	x	x	x	x

\* geskatte frekwensie van verwantskapsterme in geval van homonieme word aangedui deur ">"  
 Vetgedrukte hoofletters 'X' veronderstel belangrike leemtes ten opsigte van die lemmatisering van verwantskapsterme.

**Tabel 6:** Frekwensie in die PSC en opname in GNSW, SLEPD, ONSD, PTLH, PUKU 1 en POP van enkelwoord verwantskapsterme in Prinsloo en Van Wyk (1992)

Nie alle weglatings, in vergelyking met die ander woordeboeke moet as leemtes beskou word nie. So, byvoorbeeld, is die weglatting van *matswale*, *mmakgolo*, *ratswale*, ens. uit ONSD regverdigbaar in terme van gebruiksfrekvensie wat as kriteria vir opname in dié woordeboek dien. Weglatting van *mma* en *tate*, uit die SLEPD, met 'n gebruiksfrekvensie van respektiewelik 1,060 en 1,517 in die PSC, kan egter as 'n leemte of fout beskou word. Net so is *mogolle* opvallend afwesig in SLEPD en PTLH.

Die tweede leemte geld die kwaliteit van bewerking van verwantskapsterme wat wel in die woordeboek opgeneem is. In baie gevalle is die gebruikersleiding wat woerdeboeke ten opsigte van verwantskapsterme bied nie duidelik nie of selfs misleidend. Die inligtingsaanbod is gewoon nie genoegsaam kontrasterend, gedetailleerd of diskriminerend nie. So, byvoorbeeld, vind die gebruiker wat die woord *malome* in PTLH opsoek die betekenis *kgaetšedi ya mma* 'moeder se broer'.

**malome (leina ka botee) (1a/2a)**  
*kgaetšedi ya mma : Malome*  
*kgaetšedi ya mma ke majadihlogo*

**Figuur 6:** *Malome* in PTLH

Die gebruiker wat onseker is oor die presiese betekenis van die ander verwantskapsterm in die betekenisparafrase, *kgaetšedi*, soek dit vervolgens in dieselfde woordeboek op:

**kgaetšedi /kgaetšédi/ (*leina ka botee*)**

(9/10) *ngwana wa batswadi ba ka wa mosetsana goba wa mosadi : Tameng kgaetšedi! Naa go bjang ngwanešo?*

**Figuur 7:** *Kgaetšedi* in PTLH

Uit die betekenis "n vroulike kind van my ouers" (*ngwana wa batswadi ba ka wa mosetsana goba wa mosadi*) kan die onervare gebruiker foutiewelik konkludeer dat *malome* verwys na "n vroulike kind van my ouers van my ma" in plaas van 'moeder se broer'. SLEPD vaar nie veel beter nie deur bloot *malome* met *uncle* te vertaal sonder enige verwysing na moederskant. POP en GNSW doen beter met die vertaling van *malome* as *my maternal uncle* 'my oom aan moederskant'. Die GNSW-artikel word in figuur 8 aangegee.

**MALÓME, -/bó-** oom aan moederskant //  
maternal uncle; cf. **MALÓMÁ-** [vir same-  
stellings] // [for compounds]

**Figuur 8:** *Malome* in GNSW

In POP en SLEPD word die vertaalekwivalente *malome*, *ramogolo*, *rangwane* vir die lemma *uncle* aangegee. Meer gebruikersleiding soos *moeder se broer*, *vader se ouer/jonger broer* is hier noodsaaklik vir beide teksresepsie en teksproduksie.

SLEPD gee ook die vertaalekwivalente vir *kgaetšedi* as 'my sister, sister' terwyl PUKU 1 die vertaalekwivalente 'jonger suster van 'n broer' en 'jonger broer van 'n suster' aangee. Die gebruiker is dus nie seker of *kgaetšedi* slegs na 'suster' of na 'suster of broer' kan verwys nie.

Volgens GNSW beteken *mogadibo* 'broer se vrou' maar is dit 'n term wat slegs deur sy suster gebruik word. SLEPD en ONSD gee egter sonder enige beperking die Engelse vertaling *sister in law* 'skoonsuster' aan. Hierteenoor gee PUKU 1 naas 'skoonsuster' ook 'skoondogter' as vertaling aan. Dit kan ook die gebruiker verwarr.

Die inligtingsaanbod ten opsigte van 'n spesifieke lemma verskil uiteraard in woordeboeke maar die vraag is of die leksikograaf in hierdie gevalle behoorlike voorafstudie van die terme gedoen het.

Die leksikograaf moet ook seker maak dat die inligtingsaanbod by die meervoudsvorm nie verskil van dié by die enkelvoudsvorm nie. So, byvoorbeeld, gee PUKU 1 by *mokgotse* ook skoonsuster as vertaalekwivalent maar nie in die artikel van die meervoudslemma *bakgotse* nie.

Dit is ten slotte opmerklik dat die gebruikersvoorbeeld dikwels nie bydra tot die semantiese kommentaar nie. Vergelyk die volgende voorbeeld uit ONSD:

<b>malome</b> ** noun 1a/2b (pl. <b>bomalome</b> ) ■ maternal uncle • <b>Malome</b> wa ka o nyala mosadi wo mobotse. <i>My maternal uncle is marrying a beautiful woman.</i>	<b>mogolle</b> noun 1/2 (pl. <b>bagolle</b> ) ■ older sister/brother • Ga o kwe ge ke re <b>mogolle</b> o be a diretswe monyanya. <i>Don't you hear when I say that a wedding feast was held for my older sister?</i>
<b>mogolo</b> <sup>3</sup> * noun 1/2 (pl. <b>bagolo</b> ) 1 ■ older sister/brother • Ge mma wa ka a re soletše dijо, go thoma <b>mogolo</b> wa ka go kgetha. <i>When my mother served us food, my older brother was the first one to choose.</i>	<b>mogadibo</b> /mogadibô/ noun 1/2 (pl. <b>bagadibo</b> ) ■ sister-in-law • <b>Mogadibo</b> wa ka o belege ngwana wa mošemane maabane. <i>My sister-in-law gave birth to a baby boy yesterday.</i>

**Figuur 9:** *Malome, mogolle, mogolo en mogadibo* in ONSD

Meer as 50%–80% van die woordeboekspasie vir die artikels van *malome*, *mogolle*, *mogolo* en *mogadibo* dien nie werklik enige doel ter verheldering van die betekenis nie want in al vier gevalle kan die betrokke lemma bloot met enige ander toepaslike naamwoord vervang word. Dit is wat Rundell (Atkins et al. 1997) lys as een van die tipiese kenmerke van swak voorbeeldige naamlik "are natural, typical ... but completely pointless (e.g. Sicilian: a quarrel between two Sicilians)". Selfs die MED se bewerking van *uncle* stel in hierdie opsig teleur deurdat die gebruiksvoorbeeld *the business was owned by my uncle* nie tot betekenisverheldering bydra nie:

**uncle** 'ʌŋk(ə)l noun [countable]  
the brother of one of your parents, or the husband of your AUNT .  
You are his **niece** or **nephew**  
The business was owned by my uncle.  
a letter from Uncle Richard  
a used by children in front of the name of a man who is a close friend of their parents  
How long have you known Uncle Phil and Auntie Carol?

Hier kan *uncle* netsowel met enige ander naamwoord vervang word. MED is wel voortrefflik deurdat Ego in die bewerking van die lemma in ag geneem word dit wil sê in watter verhouding ek tot *uncle* staan, naamlik sy neef of niggie. Dit dra veel meer by tot die betekenisinligting as die gegewe gebruikersvoorbeeld. Weglating van die gebruiksvoorbeeld in bogenoemde gevalle

doen weinig afbreuk aan die kwaliteit van die artikel en die leksikograaf kan dit selfs oorweeg om die verhouding waarin die persoon tot die lemma staan as die tipiese gebruiksvoorbeeld aan te bied by verwantskapterme, bv. *ek is my oom se niggie* en *my broer is sy neef*.

### 5. Samevatting

Die Sepedi leksikograaf is terdeë bewus van sy/haar rol as tussenganger tussen komplekse grammatikale strukture in die taal aan die een kant en veral die onervare woordeboekgebruiker aan die ander kant. Sekere strukture in die taal soos verwantskapsterminologie, die modale vorme van die werkwoord en kopulatiewe vereis innoverende lemmatiseringstrategieë ten einde die gebruiker in staat te stel om die verlangde inligting in die woordeboek te vind. Die aard en omvang van verwantskapsterme in Sepedi vra ook meer as die blote lemmatisering op lukrake wyse en op sterkte van die intuisie van die leksikograaf, of die blote gebruik van 'n frekwensieafsnypunt in 'n Sepedi korpus. Wat die lemmatisering van verwantskapsterminologie betref, is aangetoon dat dit problematies is, veral ten opsigte van die lemmatisering van samestellings, oftewel afgeleide enkelwoordvorme en die lemmatisering van frases soos veelvuldige besitskonstruksies. Die leksikograaf moet in die eerste plek alle leksikografiese bewerkingstrategieë soos vertaalekwivalente, parafrases (definisies), gebruiksvoorbeeld en kruisverwysings na buitetekste en eksterne bronre maksimaal benut. Vir die leksikografiese bewerking van komplekse strukture soos verwantskapsterminologie is dit egter nodig om verdere gebruikersleiding te gee, veral ten opsigte van die toegangstruktuur vir afgeleide vorme en verwantskapsterme wat as multiwoord konstruksies voorkom — derhalwe die aanbod van 'n leksikografiese konvensie vir die lemmatisering van verwantskapsterme in omvattende woerdeboeke vir onervare gebruikers wat in hierdie artikel voorgestel word.

### 6. Literatuurlys

#### A. Woerdeboeke

- (GNSW) Ziervogel, D. en P.C.M. Mokgokong. 1975. *Pukuntšu ye kgolo ya Sesotho sa Leboa, Sesotho sa Leboa—Seburu / Seisimane/Groot Noord-Sotho-woordeboek, Noord-Sotho—Afrikaans/Engels/Comprehensive Northern Sotho Dictionary, Northern Sotho—Afrikaans/English*. Pretoria: J.L. van Schaik.
- (MED) Rundell, M. (Red.). 2002. *Macmillan English Dictionary for Advanced Learners*. CD-ROM. Londen: Macmillan Education. Tweede uitgawe 2007 op CD-ROM. Londen: A&C Black Publishers.
- (NSD) Prinsloo, D.J. en B.P. Sathekge. 1996. *New Sepedi Dictionary, English—Sepedi (Northern Sotho), Sepedi (Northern Sotho)—English*. Pietermaritzburg: Shuter & Shooter.

- (ONSD)** De Schryver, G.-M. et al. (Eds.). 2008. *Pukuntšu ya Polelopedi ya Sekolo. Sesotho sa Leboa le Seisimane. E gatišitswe ke Oxford/Oxford Bilingual School Dictionary. Northern Sotho and English*. Kaapstad: Oxford.
- (POP)** Kriel, T.J., D.J. Prinsloo en B.P. Sathekge. 1997. *Popular Northern Sotho Dictionary, Northern Sotho–English, English–Northern Sotho*. Kaapstad: Pharos.
- (PTLH)** Mojela, M.V. (Ed.). 2007. *Pukuntšutlhaloši ya Sesotho sa Leboa*. Pietermaritzburg: Nutrend.
- (PUKU 1)** Kriel, T.J. 1983. *Pukuntšu Dictionary*. Pretoria: J.L. van Schaik.
- (PUKU 2)** Kriel, T.J. en E.B. van Wyk. 1989. *Pukuntšu woordeboek, Noord-Sotho–Afrikaans, Afrikaans–Noord-Sotho*. Pretoria: J.L. van Schaik.
- (SLEPD)** Mojela, M.V., M.C. Mphahlele, M.P. Mogodi en M.R. Selokela. 2006. *Sesotho sa Leboa/English Pukuntšu Dictionary*. Kaapstad: Phumelela.

## B. Ander literatuur

- Atkins, B.T. Sue, M. Rundell en E. Weiner.** 1997. *Salex'97. A Training Course in the Compilation of Monolingual Dictionaries*. Ongepubliseerde kursusmateriaal van 'n tutoriaal gehou by die Woordeboekeenheid vir Suid-Afrikaanse Engels, Rhodes Universiteit, Grahamstad, 15–26 September 1997.
- Prinsloo, D.J. en Sonja E. Bosch.** 2012. Kinship Terminology in English–Zulu/Northern Sotho Dictionaries — A Challenge for the Bantu Lexicographer. Fjeld, Ruth Vatvedt en Julie Matilde Torjusen (Eds.). 2012. *Proceedings of the 15th Euralex International Congress*, 7–11 August 2012: 296–303. Oslo: Department of Linguistics and Scandinavian Studies, University of Oslo.
- Prinsloo, D.J. en R.H. Gouws.** 1996. Formulating a New Dictionary Convention for the Lemmatization of Verbs in Northern Sotho. *South African Journal of African Languages* 16(3): 100–107.
- Prinsloo, D.J. en J.J. van Wyk.** 1992. Verwantskapsterminologie van die Noord-Sotho. *South African Journal of Ethnology* 15(2): 43–58.
- Tarp, Sven.** 2008. *Lexicography in the Borderland Between Knowledge and Non-knowledge. General Lexicographical Theory with Particular Focus on Learner's Lexicography*. Lexicographica. Series Maior 134. Tübingen: Max Niemeyer.
- Van Wyk, E.B.** 1987. Proclitic *bo* of Northern Sotho. *South African Journal of African Languages* 7(1): 34–42.